

## AUGURI DI BUON ANNO ALLA TERZA ETA'

### Gh'è pasaa 'n altr'an

L'è scapaa coi so magagn.  
I sentu che frecass, che bacan?  
So no vialter, ma mi som vegett  
Ho preferii sta bel coc nel me lett.  
Som levaas su la matina a bonora  
Tra 'l ciar e scur, pena l'aurora  
Per strada gh'era nissun  
Se per caso incontravi on quaivun  
Ghe fasevi tanti auguri  
Compagnaa di debit scongiuri.  
Ghe disevi: "Car amis, me te stee?"  
"Ringraziando 'l Signor : sto 'nmò in pee!"  
E insci, in bona compagnia  
Saludom on altr'an ch'el va via.  
E spetom quel noeuv: chissà 'me 'l sarà ?  
Perché la vita l'è tut on spetaa.  
Quand s'è piscinin se speta de cress  
(e fèmm a la svelta, semm minga de gess!)  
Quand poeu riva la gioventù  
De mett su ca se ne pò pu.  
Poeu vegn i fioe, neod e neodin  
E semm tucc content, grand e piscinin.  
A la fin, però, se resta strac  
I ann passen e sem on po' fiac.  
Ma se desmett mai de spetaa  
Se speta semper, se speta e se spera.  
La matina se speta la sera  
E la sera che vegna matina.  
Ve n' cunti su vuna bela,  
Roba vera, no 'na storiela :  
Ho conussu 'n brav'om cont in sui spall tanti ann  
Tanti fastidi e tranti magagn.  
G'ho dì: " Me car scior, come la va?"  
Lu 'l ma dì: "Som chi a spetaa".  
El spetava 'l so moment  
E l'era no malcontent  
El spetava ch'el Signor la ciamava  
Per quest not e dì lu 'l pregava.

Ho imparaas 'nca mi  
Sentendol parlaa insci  
L'importanza de tegnì 'n del coeur  
La speranza fin che se moeure.  
La speranza l'è 'na gran virtù  
Che ma daa 'l bon Gesù  
Con la fed e la carità  
L'è tuta grazia de conservà.

**Alora vel disi mi perché se finis mai de spetà :**

**PERCHE' 'L PUSSE' BEL L'E' 'NMO DE RIVA' !!**

*(Auguri di Buon Anno2014 da Don Arnaldo)*